



Kanoana

<i>Te Kamauri</i>	1
<i>Kaongora mai irouumi</i>	2
<i>Kaongora man NSC</i>	6
<i>Ana Tangira Te Uea</i>	7
<i>Taeka n Reirei</i>	8
<i>Nana Taratara Iesu</i>	9
<i>Ana Tangira Te Uea</i>	9
<i>Te Maiu ae Tabu</i>	12

Te Kamauri

Kam na mauri n ana Tangira te Uea.

Ti uaia ni manga karaba ao n neboa te Uea ngkai E kona ni kateimatoa ana baintangira ae "Emmanuera, te Atua i buakora" nakoira ngaira taan wareware aika karineaki ao tarira ma manera inanon ara botaki ni charismatic iaon



Kiribati, Nutrian, Biti ao n tabo nako ake kam mena iai. N te tai aio ao e kan kananoi ma ngkami Emmanuera boto n iango aika uoua. Te moan bon buokaia tarira ma manera ake n te Burikatorio. Aio are bon boto iaon ara onimaki ni kataorika are botakia taan onimaki n te rabata ae ti teuana- ba ngaira aika ti maiu i aonteaba; tamnei ake n te burikatio ao tarira ao manera ake a tokanakai i Karawa. Ti bia uaia n reitaki n ara tataro n bubuti buokaia ake a kainnanoi ara tataro n te burikatorio ba

"te burabeti ae Iataiaae kangai" "Ukera ao wetea Iawe ngkai e kai reke ba E kaan".

E na nanoangaia te Uea ao ni waekoa ni karkoia i Rarikina i Karawa inanon kororaoin te kukurei n te mimitong. Bon aio te katei ae moan te tamaraoa ibukira ngaira taan onimaki ba ngkana iai kain te burikatorio ae a kabaraaki n uaan ara tataro, ao a na manga bon buokira n aia tataro inanon ara kekeiaki n te maiu aei.

Te kauoua n iango are e kan kananoa naba Emmanuera n te tai aio bon ana kibu n taeka te burabeti ae Itaia (55:6) ae kangai "Ukera ao wetea Iawe ngkai e kai reke ba E kaan". Ngkai e nang roko tain te avenete are te tai ni katauraoi ao ni kariaria rokon te Tia Kamaiu ao ti na riai ni manga tanrikaki nakon te Uea ao ni karekea ngkai E kaan. Are namona ba ngkai bon te tai ae kaan ao tiaki te ingabong. Ara rairannano bon te bai ti riai ni karoia n te tai ae ngkai, ao kaanin te Uea ni kona n reke iroura bon inanon maiura i aonteaba.

Bon ana tataro Emmanuera ba e na karoiroi ngkami te Uea inanon ami tai ni wareware ao mani karekei tibangami aika tamaraoa ibukin karakaan ao karikirakean ara tangira ma Ngaia te Atua ae te Tia Karikira. Bon ana katekeroi naba E mannuera nakoira ni bane ao ara bai ni kabane te mauri te raoi ao te tabomoa.

Koa tia ni manga noora riki ara website? <http://www.kccrs.org.ki>

The website features a header with the Emmanuera logo, the title "Kiribati Catholic Charismatic Renewal Service", and a portrait of the Virgin Mary. The navigation menu includes links for "Kainikatikura", "Te Maiu Ae Tabu", "Ana Tangira Te Uea", "Emmanuera", "Bokin Te Aro", "NSC", "Ibuobuki", and "Rinnako".


Kiribati Catholic
Charismatic Renewal
Service

Ibukin am rongorongo, taiaoaka reitaki ma Uriam Timiti, Beneteta Raobati ao Kautoa Tonganibela.

Phone: + 679 3385364
Fax: 555-555-5555
E-mail: timiti_usp@yahoo.com; bene_raobati@yahoo.com.au
kautoat@yahoo.com



St PADRE PIO STUDIO



E a bobonga raoi aobitin ana tabo ni katangtang ao n rawebana **St Padre Pio Studio** iaon Betio.
Ko raba Te Uea
Alleluia!!!



Kaongora mai Iroumi

Rongorongo mai Suva, Fiji
Uriam Timiti, St Padre Pio Charismatic Group
Bentekota ao te kainaomata

E raba te Uea ba e a manga reke angan ara tai ni botaki n nebonebo ao n reita te katituaraoi n te aonaba nakon te Uea ibukin ana bai n Tangira nakoi- ra ae bon te Tamnei ae Raoiroi. Ti karaba naba Fr Martin Everi ni butimaeakira ba ti na butimaea Bentekota n aia tabo ae Wailoku are bon nneia taari n te MSC. E moananki kanoan te bong aio n te Tutia ao imuina ai bon te nebonebo ao e a reitaki naba ma te kainaomata. Bon ruaman maitia ake a kainaomataki n te tai aio. Ti karaba te Uea n tibangara ake E anganira te Uea inanon te bong aio n aron aikai:



1. Ba kororaoin te maiu bon inanon te Tamnei ae Raoiroi are E berita lesu imain waera- kena nako Karawa ba E na kaokia. Ngke e mate lesu ioan te kaibangaki ao ti bane ni kamaiuaki ni kaitiaki man te bure are ti bungiaki inanova ao te kamaiuaki aio are ti anganaki ngaira aomata ni kabaneia n akea ara baire ba ti kan butimaiia ke ti aki. Are nanona ba kanga bon te karea n ianomata nakoira. Ma kororaoin te maiu inanon te Tamnei ae Raoiroi bon ana karea te Atua nakoira ma e na ti reke ioura ngkana ti tauraoai ni butimaaia. Bon aio te tibanga ae kakawaki n tain bentekota ba te kan butia ni koaua te Tamnei ae Raoiori ba E na inaomata inanora ao aio are e na oti ioura ngkana ti kato- tongia Abotoro n te moan bentekota ake a kona n noraki newe aika taian ai n toka iaon atuia uake a mena inanon te ruu.

2. Bon noran tamnein te kai ae titebo ma aron are ti atia mani karakin St Padre Pio are bon te kai are e kaitibo iai ma te riaboro ngke e uarereke ao bon te kai naba are e tata- tario iai St Padre Pio ngke e tia n riki n tama. N ana noraba temanna te tia kainaomataki ao e taku bon te kai aio are e na kawaria ba e na tataro ianaa ao e a mimi ngke e a mauna naba rabatan te kai ao ngke e taratara nako ao e a manga nora te kai ae rangi ni bubura are nanona bai ai bon kaotan te ikawai n te onimaki riki irouwia ake a nang kainaomataki. Bon iai naba reitan noran te tamnei mairoun temanna kain St Padre Pio are e mena i Tarawa n tain naba te Bnetekota aio. E noraki te kai aio ba ngai a te kai are a bane n roko mannikiba n tiku iaona ba a na katanaki iai. Bon iai te titraki ae ti bane n anganaki ngaira kain St Padre Pio ba ti na tataroakinna ba tera raoi nanon tamnein te kai aio ibukira ngaira ni kabane.

E bara kanoan te umantabu tao imuin

3 pm ao imuina ti manga oki nako Nabua n reita nako te maroro ao te kukurei.

Te katamaroa iaon te kccrs website

E kukurei St Padre Pio ni manga kataba- nina te katamaroa ae raka n ara charismatic website are bon te kanoa ae bou ae "kanan tamneira ni katoa bong". E bobonga raoi te katamaroa aio n 15 n Aokati ao e waaki imuin ouua te wiki ni kakatai.

Kanan tamneira kanga bon aekan te 'daily reflections' are e na katoa bong. Aio bon te kanoa ae aki rang ababaki ba kanga bon ti kairan te iango ma te waaki inanon te bong teuana ma teuana. E na kona n rin taian kaoti iango (comments) mairouia akana iai nanoia. Reken te kona ni kaoti iango boni ngaia te maneka ae raka n te website are e na kareke a te anga are rangi n tamaroa n reitan karababaana ao kananoan ti- banga mairouia tarira ma manera.

Ai bon au kaitau ae moan te batu nakon Wayne ibukin ana tai ma nanona ae batu ni kan karabata te kanoanimi aio.

Kainaomatan temanna man te Kura n Tama (PRS)


Iai te rongorongo ae kakukurei ioura ngaira Padre Pio n te ririki aio ba anganakira temanna kain ara botaki ae bourei are e kainaomataaki n te Tabati 6 Nobemba, 2011. Aran kain te botaki ae boou aio bon Akorita Teebanako Savili. Teuae bon temanna ibuakoia taan angabeba n te ririki aio ao e a tauraoi n okira Kiribati ma ana beebe ae te Bachelor of Divinity man te PRS ao te beba ni kainaomata man St Padre Pio i Nabua. E uara anne? I taku ba e a bon aki kona ni waewaeaki ba are e a bon bane arona. Bon te bubuti nakoira ni kabane ba ti na uringnga n ara tataro inanon ana tai ni kakaninga nakon te Katabu n Rikan. Ti na bubuti naba ana katantan tinara Nei Maria nakon natina temanna aio.



Aio bon kanoan karakin St Padre Pio ae raka mani kakawaki ba bon anganakira kain ara botaki ae te Akorita. E na bon reke ba te tamnei teuana nakoia ara ataenimane ake a kata te nakoa n Tama n te PRS ba e kona naba n rin te charismatic inanon aia kataneiai. Tao ai bon te kauring naba nakoia kain St Padre Pio ba teuana ma ibuakon tabeia ae kakawaki bon buokaia ara ataenimane ake n te kura n tama ni kunea ao ni karina te waki ni charismatic inanon maiuia. Aio naba ana karea te Uea nakoira kain te charismatic ba a na rikirake maitia ara Tama aika a charismatic raoi ba a na kakorakora kamakaan ain ana Tangira te Atua iaon abara ae Kiribati.

Waaki riki tabeua

Inanon te ririki aio ao ti karaba te Uea ba e tia ni buokira n kateimatoai ara waaki man ririki aika a nako. Bon iai reitakira ni Bau n Nananga, ao te Novena nakon te Tamnei Ae Raoiroi. Iai naba reitaki n te novena inanon te namakaina ae Okitoba n ikotaki ma kaean te katiki ma Nei Maria n 13 n Okitoba. Inanon moan te namakaina aio ao e reke naba ara tai n reitaki n neboneyo ma kain karawa n aia toa. Ti kantaninga ba e na iai riki teuana ara kainaomata imain tokin te ririki aio, imuun banen aia ukeuke ataein te USP. Are nanona ba e a na raka tain ara kainaomata n te ririki nakon tenuia. E raba te Uea n ana baintangira aika batia oti karaba naba St Padre Pio n tataro ma ana kakawakin nakoia nara botaki.



Riiboti man Betio Parish

Kautoa Tonganibeia, St Faustina Charismatic Group

Kam na mauri tariu a maneu n ana Tangira Te Uea.

I a rimoa ni karaba Te Uea ibukin ana Tangira ae koro raoi ibukira n taaina-ko. E a tia ni kairira ao ni uouotira inanon ara borau man moan te ririki aei, ike ti nang manga moana ara katauraoi ni butimaea te Toa ae moan te kakawaki ae te Kiritimati.

N te tai aei ao I a karaba riki Te Uea ngkai E manga karekea au tai ni kaongorai ngkami ana waaki St Faustina Charismatic Group iaon Betio. Inanon ara waaki ni kabane ao ti kakaoua ba e batia man teimatoa buaka ake a kakaiatarai ara kekeiaki. Iaon Takoronga ao e manga uarereke te korakora nakon are e tia n noraki taai aika nako. Ma ti teimatoa neboa Te Uea ibukin noran te korakora ma te kakamakuri ae batia man ara tabwena ae Temakin. Man teimatoan te tataro ao aia kekeiaki ara leaders inanon te rereitaki ao aikai ngkanne ara waaki tabeua are e bon tia ni kairirira ao ni buokira iai Te Uea.

E teimatoa naba ana botaki n riita St Faustina Charismatic ni boowi ni katoa namakaina ao n taai ake a kataweaki iai ibukin babaire aika ana katiaki kanoaia.

Te buti iaan Maneaba

Inanon te botaki n riita ao a bon butiaki kaain kurubu ni kabane mai Tamakin ba a na buti iaan maneaba ni kabane n uota ana Tangira Te Uea nakoia makoro ni kabane. A bon moana

aia makuri mai Temakin ni karokoa a manga kibara Takoronga ba a bubuti kaain Takoronga te korakora ba e na uotaki naba nakoia kaain Takoronga.

Ti karaba Te Uea ibukin te tokanikai aei are e noraki ba e bon banin makoro ni kabane. Ma inanon te waaki ao e bon noraki memeren te boutoka man makoro ake a kawaraki. Angin te tai ao akeia Mitinare ke bon kaain te makoro n roko n reita te tataro ma neboan Te Uea.

Ni ikotaki ma memeren aia boutoka makoro aikai ao e bon rangi n uarereke uaana aika reke, ba tabeua makoro a bon teimatoa naba n aki kororaoi boutokan katean kurubu ni karitimati iai. Ti bon teimatoa naba ni butia Te Uea ana buoka iaon aei, ao man anganira riki te korakora ao kawaira ni manga buti riki iaan maneaba ke makoro ni kabane inanon taai aika imaira.




Rereua, te reirei ao te kainaomata

Ni moa man 23 September are tairikin te Kanimabong ao e baireia te bowi n riita ba e na moanaki iai kanoan te rereua ma te Tutia are e kakaraoia te Bariti ni katoa kanimabong. E moanaki naba iai te aki mamatam ao te tiku imwin te tutia n tantani i matan te Eukari. Ti karaba Te Uea ba ni katoa Kanimabong are e kaotinakoaki iai te Eukari ao e kateaki naba ana tai n tantani St Faustina Charismatic Group ibuakon taai ake anganaki makoro ni kabane n te Bariti. Ni katoa Kanimabong ao e bon teimatoa St Faustina Charismatic Group ni kakaea ana tai ae te aoa 11pm n te tairiki ni karoa ana tataro n tantani imatan te Eukari.

Ngaia are i muin te Tutia n te bakantaai anne ao a manga kaitibo naba ara koraki ni kaitibo ma Te Uea n te Eukari. Imwin ara tataro n tantani ao ti a manga bane n reitaki ni karoa ara reitaki n neboneyo i matan te Eukari n te nukanibong naba anne.

N te ingabong are imwina are te Kanobong 24th September ao ea wakinaki kanoan te rereua n ana maneaba Fr Ioane i Temakin. E bon moanaki ma te rotario, ao rimuiai naba ma te neboneyo. Ti karaba Te Uea ba a bon roko raoi n te Kaabong n te wiiki anne ana bai ni katangtang St Padre Pio Studio ake a kaaaki mai America. E bon rangin rokoraoi neboan Te Uea ma baai ni katangtang aika a bon rangin riinga te



"E bon teimatoa naba ana botaki n riita St. Faustina Charismatic ni boowi ni katoa namakaina ao n taai ake....."





“....bon ti uoua taeka ae
“te ongotaeka ao te
kakaonimaki” ba bon te
kawai ibukin katanan ao
kateimotoan ke
kakorakoran ara karea
ake e bon tia n anganira Te
Uea”

nano n aron neboan Te Uea n te tai anne.

Inanon te rereua, ao ti a bon karabaia ara Tama ae Fr Ioane, Fr Berekeman ao ai Fr Koru ni boutokan ara rereua n te wiiki anne. Inanon te reirei ao Fr Berekeman e bon boboto ana reirei ibukin tibangaia kaain te Karitimati ki ni boutoka aia makoro iaon Betio. E boboto ana reirei Fr Berekeman iaon te kakaonimaki ba e bon aki kororaoi ara makuri nakon Te Uea ngkana akea ara boutoka nakon ara makoro inanon ara bariti (parish) iaon Betio.

Te kauoua n reirei e bon karaoaki iroun Fr Koru ngke e bane kanoan te Bau n Nanoaga ao karaoan Kawain te Kaibangaki. Ana reirei Fr Koru e bon boboto iaon kinakin ana

Karea Te Tamnei ae Raoiroi, kari-kirakean karea, katanan taian karea ao ai kakorakoran karea irouia kaain te karitimati ki. Ti karaba naba Te Uea ba a bane n reke tibangara ni kabane inanon te reirei ao bon mataata raoi, n reitaki man taian titiraki aika batu irouia ara koraki nakon Fr Koru ibukin taian kamataata.

Inanon tibanga aika a reke man ana reirei Fr Berekeman, ao Fr Koru ao bon ti uoua taeka ae “**te ongotaeka ao te kakaonimaki**” ba bon te kawai ibukin katanan ao kateimotoan ke kakorakoran ara karea ake e bon tia n anganira Te Uea ba bain neboana ao buokan ara makuri ni kabane.

Ngke e a boo 7pm n te tairiki ao ea kainaki ara rereua iroun Fr Ioane e bon rangin rokoraoi naba ara tutia ba e bon irianaki ma baai ni katangtang ake a kairia kaain St Padre Pio Studio (Ilan ao Teibi) inanon te Tutia.

Imwin te tutia, ao e bon kaota ana karabaraba Fr Ioane ibukin te katauraoi raoi imain te Tutia ao riki ibukin te katangtang are e katamaroa taromauriakin ao neboan Te Uea n te aro ae rangin riinga te nano.

St Faustina Charismatic feast day

N te bong ae 5th October n te ririki aei ao ti bon bukamarua ana bong ke ana Toa ara saint ae St Faustina. E bon rangin n kakawaki te bong aio ioura ni katoa ririki n reitaki iai n neboa Te Uea ibukin ara Saint aio are bon ngaia ingoan ara botaki ni karitimati ki n ara bariti ae banin iaon Betio. E bon moanaki kakawakin te bong aio ioura man 2009 nte tai are e moan toka iai aran ara botaki ae banin iaon Betio ba St Faustina.

Ni ikotaki ma tinara ae Nei Maria, ara Saints aika Padre Pio, St Theresa n Iesu Te Tei, St Mikaere te Akanera, ao St Faustina e a bon tia n riki naba ba te tia kawakina ara botaki ni karitimati ae banin iaon Betio, ao ea tia naba riki ba te tia buoka ao ni kaira ara waaki ke tibangara ni kabane ibukin neboan Te Uea ao kakoraoan ana babaire iaon ara tabo ae Betio. E bon waaki

bukamaruan ana bong St Faustina n te Tutia n tairikin te Katenibong 5th October nte Umantabu ae St Bauro i Takoronga are e bon kairia naba ara Tama ae Fr Koru.

N te bong anne ao ti bon rangin n karabaia ara koraki ni kabaneia, ni ikotaki ma ara roroni kirake ae riaon teningaun tabun maitia ake a karokoraoa te Tutia n aia uaboki ao n aia ukareia ni ikotaki ma aia thanks giving. A raba naba kaain St Padre Pio Studio ibukin aia bai ni katangtang ma aia katauraoi ni kabane ibukin te kamate anene ma kanakoraoan te Tutia.



Imuin te Tutia, ao a manga bane n tiku ara koraki ibukin te neboneybo are e kairia naba Fr Koru. Bon iai naba kanoan te maneaba are e manga waakinaki ma ara irua ake bon tarira ao manera ake a reke rokoia mai Bikenibeu.

Ti bon rangin karabaraba nakon Te Uea ibukin ara Saint ae St Faustina are e tia n anganira ao are e bon ngaia naba ae katamaroa aron neboan Te Uea ioura n te tai anne.

St Padre Pio Studio ma tibanga ibukia ara roroni kirake

Ti kan kaitaua riki Te Uea ibukin ara bai ni katangtang ake a bon tia n roko ngkai. E a tabanin ngkai ara bai ni katangtang n roko ma i America. Ti bon karabaia Thomas Namakin are e mena i Honolulu are e buokira ni karekei ara bain ni katangtang aikai mai America. Ti karaba naba Chris Reiher are e buoki katokakin ao ni karokoi ara bai



ni katangtang n te wanikiba mai Honolulu nako Matiare ao nako Tarawa. Ti bon rangin karabaia naakai ibukin aia boutoka ma aia anganano aika bati. E na bon kabooi muin aia ibuobuoki Te Uea. Ti kan anga naba ara kaitau ae moan te batu nakon ara Tautaeka ibukin ana bouka te mane are ngaia ae a kona iai ni karekeaki baai ni katangtang aikai.

Ngke e a banin rokon ara bai ni katangtang inanon September ao e bon booa ana nebobebo St Padre Pio Studio ma taian riita ni kabane iaon Betio n ana auti Tonganibeia Taam i Takoronga. N te tai anne ngke e tia ni kaukaki te botaki n te nebobebo ao a karaoa ngkanne aia kamataku kaain te Studio aio nakoia riita ake a roko n te tai anne. Boni iai kamataku n te anene ma baai ni katangtang ao te kaotioti are a karaoia kaain te roronrikirake.

Te boto ni iango n te bong anne bon katean tamnein waaki ake ena kona ni karaoi St Padre Pio Studio ibukin karikirakean taarena ni katangtang ao ai bon kaotioti ake e na reke ba anga ni kabuta ana rongorongo Te Uea nakoia aomata n rinanoia ara roronrikirake.

E bon tiku ngkai waakinan ana makuri te Studio aio ioun tarira ma manera aika lan (Te Tia Babaire n NSC) ao ai Teibi (Te Tia Babaire n ana roronrikirake St Faustina Charismatic group). E bon tararuaki ngkanne te studio aio ioun te botaki n riita iaon Betio are e bon babaireaki aron waakina ioun te Tiibi Riita ma kaain ana Taibora inanon te tai moa aio.

Kawaraka aoraki ao buure

E bon teimatoa naba kakawaraia aoraki ao buure irouia kaain St Faustina iaon Betio. N ana babaire te botaki n riita ao e bon baireia ba kaain Temakin a na tabena kakawaran te onaoraki ni katoa Kauabong inanon te wiiki. Kaain Takoronga ngkanne a bon kekeiaki naba ni kakawaria kaain te onibure ni katoa Kaonobong n te wiiki.

Inanon te Kaonobong ae nako 12th November ao e kawaraki te onibure ioun ana rabata St Faustina ae banin are a botaki iai ni kabane kaain Takoronga ao Temakin. E raba Te Uea ibukin aio are e bon noraki naba nanoia tarira ao manera ake a mena n te tabo aio, ake a bon rangin kainnanao ana buoka ma ana kamaia Te Uea nakoia. E bon rangin nakoraoi naba te nebobebo n te taian anne ma taian tibatiba ake a kaoti naba iai ana Tangira Te Uea nakoia tarira ao manera aikai. E a tia naba te babaire imuui te maroro ma buure nte tai anne ba a na manga kawaraki riki buure n aron aio n tain te Kiritimati.



E raba Te Uea ibukin tibangara aika bati ake tia bon tia nikabane ni kekeiaki inanon inanon namakaina aika tia n nako. A bia riki mamara ma kabaka nikabane ba kakorakorakin ao katamaraoan riki waaki inanon boong aika ana roko.

E raba Te Uea riki ibukin muiokora iouna ao kabongakira ba ana bai ni makuri (instrument) ngaira i ni kabane. E raba Te Uea Alleluia!

**“TE UEA am Bai Te Maaka,
Te Tautaeka ao Te Neboaki n aki
Toki”**

*“E raba Te Uea riki
ibukin muiokora iouna
ao kabongakira ba ana
bai ni makuri
(instrument) ngaira i ni
kabane”*



Kaongora man NSC

Ribooti imuin kawaran Marakei
Ioane Teingoa, Emmanuera, Tearaereke

Aio ana kaongora Emmanuera Catholic Charismatic Renewal mai Teaoraereke Parish ni kawaran te abamakoro ae Marakei man 9 Okito-ba 2010- 12 Tianuare 2011 (ioun Ioane Teingoa). N rokon te Tiim aei I Marakei ao aikai bai ake e taekin nakoia kain te aba ba kanoan ana waki ngkana e buti rinanon kawa: Anga Reirei:

- Nei Maria ao te Tamnei ae Raioiroi (man ana reirei Fr Hegglin)
- Ana Karea te Tamnei ae Raioiroi (man te ICCRS Roma)
- Ara Katei rinanon te rongorongo ae raoiroi:
 - I. Kateira n akawa,
 - II. Kateira n maie ao n takakaro,
 - III. Kateira ni korokarewe
 - IV. Kateira n bai n aoraki,
 - V. Kateira ni kaneweaba ao ni mweaka,
 - VI. Kateira n kateitei-maneaba ao auti,
 - VII. Kateira n ununiki ke n ribana,
 - VIII. Kateira n tabutabu.

Aikai bai ake e tangiria te Tama Koru Tito ba a na kauringaki iai kain Marakei, n reitaki ma itera ake a irekereke iai maeuia ma maakan te ro n aekaia nako.

- E bon aki butimai katei akanne tinara ae te Ekaretia ao riki ti bon tinanikua iai te Tia Karikibai ae Atuara ao a riai ni bane ni kaakaki ke ni kamaunaki nako.
- Te Karemo- N ana reirei te Tama Koru ao ti riai ni kabatia te 'aki mamamatam' ke te 'karemo n tamnei'-(Spiritual Fasting) n tain te makuri.

Te kanoa inanon kawa bon Kaitiakan taian mwenga ma kaina n reitaki ma te Karemo; Manga kamarurungan te botaki n tataro te Renewal; Anga reirei ni katoa tairiki iaon Nei Maria ao te Tamnei ae Raioiroi. Baika ti wakin iaon Marakei aikai bon ti tebo ma are ti a tia naba ni waki iai iaon Nonouti.

N rokora i Marakei n te Kaonobong ae 9/10/10, ao bon te bong ae kakananato ba ana bong Ana Tanga Nei Maria iaon Marakei ni kauringa ana ka ubui n ririki moan tein te Commissum iaon Marakei ao e babane Marakei ni kabane ni maneabaia ae Atiniban lesu. Ana babaire te Tama Tikoua ba ti na tiku ni kantaninga te baranako n te Katenibong 13/10/10 are a na bane iai n okirikaki aia iruwa kain te Tanga ake a roko mai iaon aba ao kain kawa nako a na bane n okiri aia kawa nako. Ao ti na moana ara makuri man te Kaabong ae 14/10/10 ni moa man te kawa ae Temotu ao ai te kabanea Rawannawi ngkai bon te matabaia-wa. Ma inanon ara tai n tatanninga anne ao e a ibetutu naba te kainano irouia aoraki ao ikanne are ti kawaria aoraki iaon Rawannawi ao ti a katia naba aroia ao tiaki manga okiria iaan te koaua ae Rawannawi bon te kawa ae bubura ao

a rangi ni maiti iai Katorika ao e a bebete naba utora imwina.

Aikai ribooti imuin kawaran kaawa i aon Marakei-Rawannawi Taabati 10/10/10

1) Temanna te



aoraki ae e noraki aorakina ba atibu i birotona. Iai naba ana taeka te Uea are reke ba e na toki aorakina ngkana e kawara lesu n te Eukari. E a tia n tuao te M.A are e tararua te O n aoraki iaon Marakei ao e a riai ni kiba nako Tarawa, ao e a tia te babaire man te tabo n kuakua i Tarawa ba e na roko baona te wanikiba n te bakantaa aio. Ti kitana Nei Tekanikan ae te aoraki, ao ngaia e a nako ni kawara lesu n te Eukari, ao n okina ao e a bon bua naba te maraki arei, ao e a kakoauaki anne ba te M.A e taetae nako Tarawa ni kaotia ba e a marurung te aoraki ao e a taona kiban te wanikiba. E raba te Uea ni kororaoia Ana Tangira, Ana Nanoanga ao Ana kamaeu nakon Nei Tekanikan.

2) Nei Miranda- e tibaia ba e a kaman


roko angina iouna ngke e tairiki ao n te bong aei e a reke iouna te kukurei ba e a ataia ae e a bane n nako bai ni kabane ioun te Uea, ao bon iai au kanganga ba I kauntaeka ma temanna ao ngaia anne ae e taonai angina ba tao iai te bai ae e karoia nakoia ao mwengau. Bon te kamatu ngai ao I aki toki ni mimia Nei Maria. E raba nakoia ba e a reke te bebete ao te rau n nano. N reitan aio ao neiei e a rairaki nakon te Katorika n ira buna ao e arangin ni kakaonimaki. E raba te Uea.

3) Temanna are kawaraki ao n tuangaki

taian noraaba e a bane kakoauai baai ni kabane ake a noraki. E kakoaua n tuku ba; "ba ti a tia ni mia ba angkaia l un ma kain au kawa ao I a bo ma temanna te eebe, ao I a tara roou te tamnein tabon te naeta, I kabara ao I a orea iai te eebe ao e a baka n te manunu. Ibukin te ara ae Tiriata bon temanna te tia wawi ao e koaua ae e a tia ni mate, ao te koroboki ane KA e bon tei ibukin Kam ae te tia wawi naba ao e a tia naba ni mate ao bon iai naba aia makuri nakanne nakoira n tai aika a nako. Ibukin ngkanne te ara ae Narebeniwai e raba ami noraba ba I a tia naba ni kamanena te bai anne ngke I roronga ngkia ma I a tia ni kaki. Ao e raba rokom i a bon itiaki ma natiu ao bu aei".

4) Aia

tibatiba temanna kain te mwenga ae kawaraki a karakinna ba iai te nou ae e taunna i nukan te auti ba katanaia. A kaotia



naba ae a karaoa naba anne n aia auti are n te marae. Ibuskin te anchor are a noraki ao a kaotia ba iai kain aia auti ae te seaman ao e tuai man kiba ao e a rangin maan n tiku ikai. E raba ba tao ngaia e rangi ni batu te manibuaka nakoira ma e raba rokomi ba tia arau ao ti a ataia ae ti a kat-anaki man baibuaka aikai. E reitia Ioane Teingoa ni kamata nakoira ba a na aki onimakina te bai teuana irarikin te Uea ao e tuangia ba a na kaki tain nou ake a tauni n aia auti ba ake a katanakia iai ma a na onea mwina n te Benetito. Ao e raba ba a kouti naba aia Benetito kain te tiim n anganai.

5) A karakinna naba kain te mwenga teuana ae Nabuaka ma Tiirebu ba bon iai rawawataia ba e a bon tiba mate naba natia tao iraua te wiki n nako, ao matena moan te kamimi ba e a tiba oki n reirei ao e amarake ao e a bon ibeia naba te maraki ni mate. Iai kukureia te tanga aio n te tibatiba irouia kain te tiim ae "iai te teinaine ae roko n reitia n tain te katokabai ao ngke e nang bara ao e a kitania ao e a riki n Anera", ao a tiku ma te kukurei ba e a nako mai irouia te rawawata ma te nanokawaki.

Temotu: 15/10/10

1) Teauae Kouen are e kamauiaki kaina-bana mairouia riaboro imuun te katokabai e a tibatiba n taku, "Bon te aomata ngai ae l mamaka te anti ao ngkana l nako taari n te bong ao l kakaia raou aei ao l aki ataia ae ngaia a maeka irouna anti aika a batu. N tain te katoka bai ngke l nora ae e riki nakon raou aei ao l a iangoia ba N na birinako ma natiu aei ni karabaira n te tabo teuana."

Ni moan rokora iaon Temotu ao teuau Bitiare e a kaman tuatua ba e nang kanakoi baai n aoraki ake e tabe iai ao e nang kaki. Ngaia are e anga ana baa, ana boki ao ai te kirkiriki are bain te bain aoraki. Ngaia are n rokora n ana auti ti karaoa naba te kaitiaki ao e bon rotaki nanona n ana wareboki ao e karaba te Uea iai. E karaba n te Uea n te rairannano ao e kawara naba te Takaramentu ni Penetenia nge e roko n Tutia te Tama i Temotu.

2) Ni mwengan Takenteang ao iai noraa-ba ake a tibaki irouia kian te tiim. A karaba te roko kain te mwenga ao ni butimaei buoka ao riki ana kamaiu te Uea ae a roko irouia. A anga nanoia ba nang okira ara Uea. Ngkanne ibukin te taari are e noraki ao a koaua kain te mwenga ba bon taekan aia ataeinaine ae e bon tabutabu ba e aki riribuki.

3) A karabrabu kain te mwenga ae Be-beaue ao Teewa n te roko ni kamarurung ao a tibaia ae kanga e a manga rin angia ao korakorai. A manga tiba mimia ba bon imain rokomi ao ti bekei, ao ngke e a tia raoi ao e a taku teuau raou aei an nako n nea am betin ni bekei anne n te kabate ba ti a katauraoira ba ae a roroko te botaki aei ngaia ae kanga ti mimi iai ba e bon koaua ami noraba.

4) N rokon te tiim n aia auti Teitinana ao Tirinnang ao e tibatiba Tirinnang ba i nanon te katokabai ao l namakina te bai ae toka iaon atu ae rangin tinebu, kanga rawatan te turam ae te

200 n riita! Ao ngke l a karongoa ao l a nora te mane ae ababaki ae e a batete mainiku ao e a roko ba e na anaai ma iaki kona ni kammakuri ba are e a taonai rawatan te turam arei iaon atu ni karokoa ae e a bara nanona ba e a kua n koutai ma l aki roko n te maing irouna ngaia are e a nako ni kitinanai. Ngke a nako kain te botaki n tataro ao l a tiku n rai ao ake a angin nanou ao l aki konamaki. I iangoia ba N na uati ao e aki reke korakorau. Inanon weneu n rai arei ao l a nora Kiroria bon te aine ae bainna n ae mata mai buru a maenako kawaira iara imaeaora ao te aine arei e a bateteai ao l a weteia ao e a bon roko naba ni kuratinai, ao ngke e bua ao l a namakina ae kanga e a reke korakorau.

5) N ana auti Tekautu ao iai noraaba ake a tibaaki ake a taetae ni burabetia te bai ae na riki nakoina. N tikura iaon Marakei ao e a bo te ukeuke ibukia Katekiti ake a na rin i Manoku ao n tain te ukeuke ao bon ti temanna ae tangiraki n te ririki aei imwin otinakon te bwi ao e a reke Tekautu nako Manoku.

Raweai 19/10- 22/10/10

1) Ni moan rokora n te kawa aei n te tairiki ao ti reitaki ma kain te aro n te raurau ao ni maroroakina aron waki ake ti na karaoi n aia kawa. A bon tia arora ao kanga e nang motirawa te aba ao e a teirake naba aia tia babaire ni kaotia ba temanna ngaia ae e a maan ni mena naba ni makan te roo, ao e a tia ni baireia ke ni motikia ba e nang kaaki ana bai n aoraki. N te tai aio ae e kaotia ba e a tauraoi ni butimaea te waki ao mai ikanne are l a butimaea nanona anne ao n tuangnga ba ti a moan baia ana bubuti ingabong ao e kukurei iai.

2) N ana auti Teariki ao e a tibatiba Teariki iaon te nebobebo ni katokabai ao taian noraaba ake a kaoti. E taku Teariki ba, "Imain wakinan te tataro ao e a kaman anga ana baa te maane aei, ma n tain te tibatiba are e noraki iai ana boki ao ana baa. E koaua ami noraba ba iai naba au boki". Ngaia are e a tuanga buna ba e na anaia inanon te ati. E reitia mani karaba te roko ao e karabaraba riki te Uea n ana buoka are E karokoa iaon Marakei ba e na rangini maiti aika a na kamaeuaki n ai arona ae temanna mai ibuakoia.


3) Inanon te nebobebo ni katokabai n ana auti Eten ao iai te taetae ni burabeti ae nako ae kangai,

"ngkai Kam tangirai, ao temanna natimi ae e na riki ba te Tama". E noraki te bai ae rara buabua iaoia te tanga aikai ma natia ao l kabaea.

Ngke e tiba te taetae n Burabeti Nei Kaai ao a bon rebwetaua naba n te tang irouia kaaro aikai ao natia ni kabane. Ngkanne e a teirake



*"....ma n tain te
tibatiba are e noraki iai
ana boki ao ana baa"*





"Ke a kukurei aika a baina te nanorinano ba e na reke irouia ana berita te Atua"

neiere te aine ao e a tibatiba ma te tang ae korakora ni kangai: "I karaba te Uea n rokomi ikai ao riki n te rongorongo are e kaotinakoa ioun tariu aio, I rangin ni mimi ba bon te bai ae ti aranna ba ara 'secret' n ara utu ba ti Te Uea ae ataia, ba aio te bai ae ti kakaraoia n ara utu ae uarereke, ti rereitaki ni katoa bong n tataro ao ti tataroakina natira ae te ataeinimane aei nakon te Uea ba e na riki ba te Berebitero. Ngaia ae e bon ringira, ba kam kanga naba nata ara iango ae e a kan reke ngkai teuana te ririki n arora aio ao e ringira ma natira ngaia ae ti a bon tang, ma ti kukurei ba ti tebo ma e a bon kaekaki ara tataro ngaia ae tin a boutoka natira aio". Kam raba ao e raba riki te Uea are e atai bai ni kabane aika raba.

4) N ana auti Nei Maria Karotu ao iai te noraaba iaon... "te mane ae kaninganingaira ngkai ti nebonebo ao l kabaea ae e a bua naba" ao "noran te kaibangaki ae e oti i eta ma tamnein lesu ae e ti oti mai roroana,...noran taian kaintekateka aika a ruo mai ieta ao iriana te taeka ae kangai: "Ba a mawa kain tekateka n Au Aro aei".

E tabeka ana karabaraba Nei Maria ibukin te roko ao riki te Uea n ana buoka, E katoria ae bon te kamatu buna, ngaia ae e bon reita te waki ao are e nako n iaaki i maeaoa ara auti ao e tabeka ana bubuti ba ti na ururinga n te tataro ba e aonga n reke ana kai n tekateka teuana ibuakon aikana a kaoti akanne.

E raba te Uea n ana kamaiu nakoia kain Marakei rinanoia kain te tiim man Emmanuel Charismatic. Bon ara kamoamoa nakoia tari ra ma manera mai Teaoraereke ibukin aia ongotaeka nakon te Tamnei ae Raioiroi ni katauia ba a na kabonganaki ba baai ni makuri ioun te Uea.

Taeka n Reirei

E rangi n raoiroi ba ti na maeuna te NANORINANO


**Beneteta Raobati, Bairiki Charismatic Group.
Teaoraereke Parish**

Te Uea kariaia ba ti na maeuakina te nano ae mangori ni koaua nakoia raora. Reireinira maeuakinan am bai n tangira ae te nanorinano.

Ke a kukurei aika a baina te nanorinano ba e na reke irouia ana berita te Atua (Mataio 5:5). Ngke ti uarereke ao ti reireinaki n tain te Taekan te Aro ba ti riai ni karinanoira n taai nako. Ti tuangaki ba ti riai ni maeuna te nanorinano. Karawa bon abaia ake a baina te nanorinano.

N te taina inanon maeun lesu irarikia ana Abotoro ao e anga te katoto i aon te nanorinano. E karinanoao E teboki waeia ana Abotoro (Ioane 13:13-17). E tuangia ana Abotoro man taku: "Kam aranai ba te Tia Reirei ao ami Uea ao e bon eti anne. Bon Ngai te Tia Reirei ao ami Uea ao l a tiba tia n teboki waemi. I tangiri ngkami ba kam na kakaraoa aei nakoia raomi. I a tia ni katea te katoto ba kam aonga ni kona naba ni ka-

karaioa ni maeumi. I tuangi ngkami te koaua ba bon akea te toro ae kakannato riki nakon ana uea ke akea te tia ua rongorongo ae e kakannato riki nakon teuare e anganna te rongorongo. Ngaia are ngkai kam a ongo te koaua aei, maeuakina ao kam riai ni kaonaki n te kukurei n te tai are kam karaoa naba aei nakoia raomi." N na kaokia riki "Maeuakina te Nanorinano!"



E rangi ni bebeti ioun te kananoanga ba e na rin i Karawa nakon te aomata ae e kaubai (Mataio 6:17). E kanganga ibukin te kaubai aei irirakin Kristo ba are a rangi ni maiti ana bai ao e a kanganga kitankakia. Ma teuare te kananoanga bon akea ana kanganga ba are bon akea oin ana bai ao e kai teirake man mananga.

Ngkana ko kunea ae ko maeu raoi ao ko riai ni karaba te Uea ba boni Ngaia ae E anganiko anne. Tai kamoamoa iai ba uringng E anga ngkai, n te bong aei, ao E kona ni manga anaia n te bong are imwina. Maeuna te maeu ae mangori, maeuna te nanorinano, tai kamoamoa. Ngkana ko aki rangi ni mwenga raoi ma e bon tau maeum ao karabaraba naba ba ko riai n uringng ae e kona n rangi ni buakaka riki maeum nakon aei. Ko tekeraoi ba iai akana a reke, e kona n ae ai bon akea! Reitanako am karabaraba ao neboa te Uea n ae e reke. Uringa raom are e aki rangi ni batu ana bai, tiba am bai ma ngaia. E kangai ana taeka Kristo naba; "ane ko karaoa nakon temanna mai ibuakoia kainnano ao ko bon karaoa naba nakoiu".

N tabetai ao e bon kan katai ara onimaki te Uea ao e anganira maeura ae e aki rangi n nakoraoi. Te nanokawaki, te rawawata, te tabeaiangai, te korakai ibukin karekean te mwengaraoi ao a batu riki bon aekan maeuia Santo ma Santa ae ti ongoongo. Ibukina ba a teimatoa n onimakina te Atua ni maeuia ao a kataua te rinanon te maeu ae aron aio ao e kukei irouia te Atua. A tia n kariaia ba a na maeuaoi riki raoia nakoia. A baina te nanorinano, a rawa n karietaki a bon tangira te maeu ae mangori. E nora nanoia te Atua ao e kanuangania n te maeu ae moan baan te tikiraoi.

E kakawaki te kanuanga are E na anganira ibukin aei ma ti a bubutia ba E na aki anganira ikai iaon te aba ma E bia taninga rokora iouna i Karawa ba ti aonga n kona n nora aron te maeu inanon te mimitong ma Ngaia n aki totoki.

Ai ngaia are ti a ataia raoi ba e aera ngkai ti riai n maeuna te nanorinano. Te Uea raora n aki toki, Amen.


N ana Taratara Iesu

Rinanon ana taratara Iesu

Fulitura Taraora, St Teretia n lesu te Tei, NZ

A bon mananga Iesu ma Ana Reirei inanon uoua te bong iaon kawaia nako Natareta ba E tuangia Ana Reirei Iesu ba e a bo aia tai n nora Tinana Maria.

"Ngke ti tabe n nakonako man anene ao n nebonebo, ao e rangi ni birimaka te tai. Akea ba e a bung taai ao e a riai ba ti nang motirawa ibukin te matu. Bon te bong ae e rangi ni kakukurei. A bane n anene ao n nebonebo Au Reirei ao ni kabanei nanoia nako iai, inanon te ngaina ae e a tia n nako ao l bon onrake n te kimareirei.



Ngke ti tabe n tekateka irarikin te ai are tia tia ni kaura, ao l noria Raraou ba a bane ni kua. A taku ba a kua man te nakonako n te ngaina arei. A bon aki ataia ba aia anene ma aia nebonebo, ngaia aika a kua iai, ba ngke a tabe n tataro, ao a bon ira buakon te bobuaka are e riki n tainako, imarenan te raoiroi ao te buakaka. Te kua are e riki man te buaka aio bon te kua n tamnei, te kua are a bon aki kinaa aika a rangi ni maiti. N angin te tai, ao e taraki ba kuan rabatan te aomata man te makuri n te bong anne. E aki noraki te tamnei ba e kua ao ngaia anne are e aki kinaaki te kua n tamnei n angin te tai.

N aiaron te rabata are e kua ao e tangira te motirawa, ao ai bon aron naba te tamnei. N aiaron te rabata are e tangira te amarake, ao ai aron naba te tamnei. Ma ai maitira aomata, aika aki ota n aio, ao iai naba ibuakoia aika aomata aika a rangi ni kakaonimaki nakoiu.

I tannakoia Au Reirei ao l kangai, 'Boti ngkami ao taubai, ba N na tataro nakon te Tama ba te Tamnei ae e Raoi, E na anganikingami te korakora ae kam kainnanoia ba kam na riki ba Au Abotoro.'

A karaoa are l tuangia ao a kainababu ma te kakanatinga.

"Tama. I butiko n te tai aio, rinanon te Tamnei ae e Raoiroi ba kona kakorakoraia aomata ake ko a tia n anganai, ba aonga n nakonako n aki rotaki n te kua iaon Te Kawai."

Ngke l tabe n taekin taeka aikai ao tamneia au Abotoro, a ringaki ao ni kabouaki n Ana Tangira te Tamnei ae e Raoiroi. Imuin kabouakia aio ao a bane ni manionako ni matu ni karokoa ae e inga-

bong. Ngke l tabe n taraiia inanon matuia, ao l kona n noria aika a maiti, ake a na ririmuiiai. I noria ake ana kakuai tamneia ao rabataia n ririmuiiai ao n aki ota iai.

I ataria naba ba te amarake ao te korakora are a na kainnanoia, e na bon tauraoi irarikia, ba N na bon teimatoa n karekea ibukia, n te angakarea ae e teimatoa, are e na tib'aki ibukin kamaiuraoia tamnei ao kamaiukia tamnei. Ti te bai ae a na karaoia bon ti butimaean te karea aio, ao ni kanna ma te onimaki...te onimaki are e norai n te Angakarea ae Tabu aio, te onimaki ae e kauka te nano nakon te Atua.



Ana Tangira Te Uea

Weteara i roun Iesu ba E na kainaomataira

Akorita Teebanako Savili, St Padre Pio, Suva

Aio te titibiba iroun Akorita Teebanako Savili are e a tia ni kabanea itiua te ririki n te Kura n Tama i Biti ao ni karekea ana beebea ae te Bachelor of Divinity. E karaoa ana kooti are Te Maiu ae Onraken te Maiu ma kain St Padre Pio i Suva ao e kainaomataki ao n riki ba temanna kain te botaki ni charismatic n te Tabati ae nako, 6 Nobemba, 2011.

Mauri tariu ao maneu n ana tangira te Uea.

I a bon reita banami ni kangai Alleluia!! nakon te Uea ae Atuara ngkai E kona ni kaota mimitongina ni baika E tangiri ba ti na karaoi i Bukina. E raba te Uea. I bon rangi ni kan tibaia nakoimai ae ana Tangira te Uea e kona ni kaumake ni urua ana makuri ni kairiribai te riaboro. Moan te kakawaki naba irou ba N na tiba aron kinakin ana tangira te Uea ae i kakaoua ba akeatiana.

Tebongina i main ae l kainaomataki ao e tuangai Uriam ae ti na tutia i Nabua ao e karoaki naba te kainaomata imuina. Ngke e tuangai te rongorongo anne ao man te tai anne are e a bon tena naba ribakin Uriam irou. E a roko te iango are kanga e taumataoi ba N na kainaomataaki ao a maiti riki. I kakaea te anga ae N na aki roko i Nabua ma te Tamnei ae Raoiroi E a bon aki kan tataninga ngaea ae E kairai nakoni bai ni kabane. Ngkanne ngke l a roko n ana auti Uriam ao au kairiribai e rangi ni korakora; kanga bon te bai ae rangi ni kamimi aron te buaka aio.

Aio te buaka ae kanganga arona ngkana ake aika a buokiko ao ngkana ake a nabo nai. Ngai irou e bon rangi n ringa maeu te kainaomata are e a tia n nako ba e kaotia te Uea ae n ti tabeua te teekan (second) ao "ko kona kinai (te Uea) ni koaua iai". Aio e tibaia Uriam ma ngaira imwin te nebonebo. Ao e taku nakoiu ba "ai kamimira aron te Uea nakoiria ngkana E na rineira ba E bon kakaoka ana banna are iroun St Betero ngke e kaakea Iesu teniuia te tai. Ma ngke e tang te moa te kateniua n tai ao kam ataia ba tera ae riki? N te tai anne Betero e tara Iesu ao Iesu e tara

"....I a bon reita
banami ni kangai
Alleluia!! nakon te Uea
ae Atuara ngkai....."



Betero. Mani kaitiboon mataia anne ae e aki reke teuana te miniti ao Betero E rangi ni uruaki n ana makuri are tia ni kaakea lesu."



God is our refuge and strength, a very present help in trouble. Psalm 46: 1

Ao anne are I taku ngai ba e riki nakoioi ba ngai ae I tuatua ba N na kooti ao ngke e a manga bane au kooti ao I a manga tuanga Uriam ba nningai tain te kainaomata? Ma ngke e a bo taina ao I bon katotonga raoi Betero n ana makuri.

Ngaia ae I riai ni karabaraba nakoia kain St Padre Pio ba a tia ni katauraoai ni koaua ba N na riki ba ana tia beku te Uea ni koaua.

E raba te Uea are Uean te Tangira, te Akoi ao te Nimamarnei, Alleluia! Alleluia! Alleluia!

Moan namakinan ana Tangira te Uea Nakou


Molly Brown, St Faustina, Betio Parish

Nte bong ae 26th June ao I nakon te reirei ae Taborio i Nooto ba I kawara natiu ae rin nte kura ikekei. I roko ngke e bakantaae ao e a boo te moanibero n tutia. I a ira te tutia ao ngke e bara ao I a boo naba ma tariu ae Taeam ao e a tuangai ba n na ira aia buti riaan auti n tibwa ana raoi ma ana Tangira Te Uea nakoia tarira ma manera ni Katorika iaon Nooto. E tuangai ba ti na kaitibo n te aoa 3 pm nte umantabu ba ti na karaoa moa ara bau n nanoanga ao ti a buti naba riaan auti. Ngke ti kawara te moan auti ao e bon rootaki nte tang neiere ti kawaria ba e a boni kaaki taekan te tataro. Ti a manga buti nakon te ka uoua n auti ao moan te kamimi aia bubuti natia te koraki aikai ba a boni bubutia te Uea ba e bia angania aia karo te marurung n tataro ao iriirakin te Tutia nte Tabati koraki. A bon rotaki kaaro aikai n ana bubuti natia ae uarereke ba ana ririki e a kaan koro 9, ao te kakukurei ba e iangabong ao a ira te Tutia n Tabati. E raba Te Uea.

Iai naba te auti ae ti roko iai ao a karautaeka ba a tabetabe moa, ti a tuangia ba e a kawa lesu are raora ni mananga ae kan kawaria n angania ana raoi ma ana tangira ao a katibankaoa ibukin tabetabeia. E a kariaia neiere te unaine ao a toka nte bwia ma natina ao tibuna. Ngke

ti a tanaki n nebonebo mangaia ao e a kauka ana taeka Te Uea neiere te nati ao ti a miimi irouia ba a bon tanaki n tatangitang te tina ao te nati. E a boo te tibatiba ao a kota makan ana taeka te Uea nakoia ba e kotaia ikai ba e boni maaka Ngaia ao te tia kamaiuia aoraki. Nte tairiki anne ni karokoa e ngaina ao aki roko nte matu neiere te tina ao te tibu ba aoraki natia ao tibun te unaine anne. A boni baebaeti ba a boni maan n aki iriira te Tutia ma ngkai a nang moana aia tataro ao moara riki ngkai aoraki aia ataei.

Nte bong are te Tabati are toan te Eukari ao e a tuangai tariu ae Taeam ba iai te nebonebo imwin te tutia ao imwina e na boo te katiki mai tabon Nooto nakon te Umantabu i Taborio nte aoa 5 pm. I a ira aia nebonebo nte Umantabu ao moan te kubanako ngai ba n taai nako ngkana I ira te charismatic ao akea au namakin ke n rotaki tao nte tang ke terana. Nte tai aio ao e a bon roko te angi teuana irou, I a tang ao inanon au tai n nebonebo ao I a karaba te Uea n tibangau ae anganai ae te nooraba, ba I noora lesu ni katiki mai tabon Nooto ao e rimoia aomata aika a maiti aika anene ao a tataro ao moan te kukurei taraana. E nakonako ao e taraa tanraken Nooto ao moan te itiaki a baireaki raoi taian uto ni karokoa tanrake, I koni n noora taari mai nanon te kawai, ao ngke e a manga taraa tanrion Nooto ao moan te kamimi ba kanga e a ti tei naba n tiaoki ao e aki matangare. I boni kababaea au tamnei aei ma e bon aki




roko n tebae ke ni bua. lesu ngke I noria e boni baina te kamarai te mainaina, e marairai buaina ao e marairai irana. Inanon tain te bubuti ao I a bon bubutia te Uea ba ae nang boni katikaki iaon abana ae Kainaba, Taborio ao Nooto ao E bia bon raira tanoia ao ni kabaroa raraana iaon tanona ao ni kakioia nako taimonio ake a taua taekaia ana botanaomata ao ni kaotaia raoi ba bon ti Ngaia te Uea ae Maaka ae a na onimakinna ao akea riki, ao I butia naba ba imwin te katiki nte bong anne ao a na toki korakoran aia baa taan tabunea. Imwiin au

bututi anne ao e a bon rawata ake a rootaki nte ang teuana ao a bon tatakuru a tang man neboneyo ao a tangiria n reitaanako aia neboneyo n ianena. E boni boo atiin te nebonebo ba a boni mimi kaaina ba a tiba nora te ang arei irouia raoia tabeman. I tiku i Nooto ni kabanea autina ni kawarii ma tariu ae Taeam, Raumua ao Miriam, I karaba te Uea ba e anganiira te marurung ni kabutaa Ueana nakoia raora ni Kiritian ake a maninganako.

Bon te mimi naba irou ba ngai te aomata ae I kakabi n tibatiba n teken nanou ba I ataia ae I katuaraa n taetae ao I a tangiria ae na bure au taeka ao e a ti boo naba te ngare. Ma nte tai aei moan te kamimi ba I a ti rabakau naba n tibatiba ao I a manga boni mimi ba te bai are I taekinna a bon tia ni karaoia kain te auti arei, n aron ae a aoraki ao a manga okira te riaboro, ao ngke a aki marurung ao a manga okira te te tataro. Te tabo aei I aki ataa tabuaiakan aona ma kaaina. E raba te Uea n ana Tangira.

Ti tataro iroun manen Bwereaata ao inanon ara tai n neboneyo I noora te maane ae tabebeti i etan atu ao lesu e tei i nukara. E taro ni maaku teuiae ao ti tebo ma e toka iaon te amake ma akea te amake ae toka iai. Ngke ti neboneyo ao I taua atuu ba I taku ba e na bakarai te aomata arei. Ti tebo ma tarakin ae maaku ni bakarai ao e maaka naba lesu ba are E tei i nukara. I kabaebaea ma e aki roko nte bae. Ngke I neboneyo ao bon ti teuana baiu ae I kateia nako karawa ao baiu are teaina I rabuna atuu iai. Ngke e a bara ao ti a maroro man tibatiba ao e a tararake tariu ae Taeam ao e a noori uoua taore aika a teke nte maneaba arei ba te aine mai tabona ao te mane mai tabona naba. A tei ni kaitara taoree aikai. Ti a tuanga neierei ba e riai ni kaitiakaki aia maneaba ba bon titebo aia maneaba ma aia maneaba ataein Taborio ao a mii buaka ataeina ao ngke a kanakoaki taore aikai ao e a toki te mii buaka ma te maaku irouia ataei.

Ti neboneyo n reitaki i Takoronga n Santo Mikaere ao ti katokabai n tamnei iaon te Tama Ioane ba e rin te O n aoraki. Inanon ara tai ni katokabai n tamnei ao I a nora lesu ba e nakon te Tama Ioane ao e kateirakea ni katekateka ao te Tama e rangi ni kukurei



ni maroro ma lesu, I kona naba n nora te Tama Ioane ba e ngarengare ma lesu. E bon nakon Room 9 n te private ward. Teuana tabun te wiiki imwina ao I a ongo iroun Ten Tenanorake ba e mena te Tama n Room 9. I karaba Te Uea n tibangau ae anganai ake kinakin ana ruu te Tama i Nawerewere. I kaotia ma te nanokawaki ba e aki reke kawaran te Tama iroa nte O n aoraki ba e bon taotaonai te tatabetabe ao ngke ti a iangoa manangara ao e a manga katabuaki kawarna.

Tekeraoi ni kabane ao ana Raoi ma Ana Tangira te Uea iaora n taai nako.

Kam na mauri tariu ao mane uana tangira te Uea.

Nei Ibon Taratiera, Nikunau Parish

I a bon rimoa ni kaitaua te Uea n ana tangira nakoia are e a kamaiuai n aoraki ae ten raraa ae tao ai uoua tabun au ririki n aorakinna.

Arau bon Nei Ibon ao kain abau bon Ten Taratiera. Ngai bon kain te abamakoro ae Beru ma I a maeka i Nikunau iroun kainnabau aei ba bon te I-Nikunau ngaia. Inanon 2008 ao e moan reke iai aoraki aio ten raraa ao n rikirake ni korakora are irou ao tao Nna bon iria nako ngkai I a tia naba n oki mai Nawerewere, i Tarawa ba e aki naba reke buokau iai. N aia ribooti taokita ao bon akea raoi oina ba tera. Aoraki aio e rikirake ni korakora are e a bon aki toki nanakon te rara ao I a bon kakabongana naba te moti (tukan te rara). Ngkana I rang kakamakuri ao e a bon baro naba ni korakora, ai ngai are ni mwengau ao bon akea te bai ae I kona ni koraoia. I aki nanakonako, I aki roroko ibuakoia aomata, I aki roroko i taun te ai, ao ngkana I wene I rarikiriki n taainako n aki kona ni wene ni baaraki ke n tararake. Moan te kainnano ngai n aoraki aio ao aron ae I rang akoakoia n nikoniako ba ngkana e bure kakamakuri ao e a manga baro te rara ae korakora. I aki naba tetebotebo ba I a tii kaokaoai naba ao ngkana I amarake ti teutana kanau n taainako. Tangiran kainnabau e birinako naba ao I a bon tangiria n wewene i bon irou n aki manga ka-



*"I a nora Iesu ba e
nakon te Tama Ioane ao
e kateirakea ni
katekateka "*






"I a okira mwengau ao I karababara nakon te Uea ba I namakina te marurung bwa e a bebete te maraki i rabatau ao iai uarereken nakon te rara mairou"

kumeaki. E a rikirake mamaran rabatau ngkai te rara e bon aki toki ao e bon nanako naba, ao aiaron ae I a bon tauraoi nakon te motirawa ba are I a bon namakina te mama-ra. Inanon weneakinan aorakiu aio ao I bon aki maenako ma tinau Nei Maria ba bon iriau n taainako. I karaba tinau Nei Maria ba boni ngaia ae bon kakawakinai are man ana kakawakin tinau aio inanon rereitaku ma ngaia ni katoa bong ao are I a riki ba kawain ana rongorongo te Uea ae raoiroi nakoimi n te tai aio. E raba te Uea.

Moan rokoia kain te tiim ni charismatic iaon Nikunau.

Bon te Katenibong te bong aei 25th May 2011, are a roko iai kain te charismatic n au kaawa ae Rungata n au makoro ae Santo Mikaere. Ma ngke e moan taekinaki rokoia kain te botaki aei i abara ao ngai I a bon rang kariaria ba I nang kainnanoa kamaiuau. Au taeka ba are a moana aia makuri mai Nikumanu, ao imwina Manriki ao ai tiba au kaawa ke au makoro, I a kaan aki kauia ba irou ao I a bon rang mamara ma I rang kakaitau nakon tinau Nei Maria ba e bon kawakinai ba Nna kauia ana tangira natina. Ngke I ongo ae a roko kain te tiim n au kaawa/makoro ao I bon rang ingainga ni kainnanoia. Ngke e a bo te amarake ni kaitibo ma ngaia ao a katanoata aron aia waaki are e na iai te nebobebo n te karangaina n te aoa 6am, ao iai naba aia katoi aoraki ibukiia ake a kainnanoa ana kamaiu te Uea. I aki roko n te tairiki anne ma I ongo irouwia kain au auti ake a kaea ao ngke I ongo ao e korakora nanou ni kariaria te tai anne ao I aki matuakenna iangoana n te tairiki anne. Ngke e a roko te bong anne ao I a kaman uti tao te aoa 3am ba e bon tuai rang oota raoi ma I rang iangoa tau- raoiu. I kaokaoai ao n oneai ao moan te mimi ngai ba ngke I a tauraoi ao e bon rotongitong naba ba ngaia e bon rang kiriaria. I a tataninga te tai ngaia are I a manga bon wenewene ao ni manga matu ma I karabwa te Uea ba E a manga kautai are I a tounako ni uti ao e a bon kakan te aoa 6 am. I a keiaki n nakonako ni kaea te maneaba are ena boo iai te nebobebo ma te karaurau ni karokoia I a roko. E bon maiti te aomata ake a roko ba tao bon te kan mataku irouwia tabinetan ao te kan kamaiuaki naba. N aron aia katanoata kain te tiim ao iai ouua aia makoro ba te moan mwakoro bon Neboan te Uea ao te kauoua ni makoro ngkanne karokoan ana tangira te Uea iaoia aoraki nako. Ngke e a waaki te nebobebo (moani

makoro) ao I a bon rang bubutia te Uea ba En a bon buokai. Ngke e a nako te kauoua ni makoro are te katoki aoraki ao I a keerake ma raou naba ake a kani kamaiuaki. Ngke a bo te katokabai ao I namakina te bai ae kounako mairou ao kanga te maraki i rabatau are e taotaonai ao I namakina ae a bebete. Ngke I a okira mwengau ao I karabaraba nakon te Uea ba I namakina te marurung bwa e a bebete te maraki i rabatau ao iai uarereken nakon te rara mairou. Te bai ae I manga kariaria riki are bon rokoia kain te tiim ke karokoan ana tangira te Uea iaan nako mwenga n aron naba are a katanoata ao bon i nanon naba te bong anne imwin tawanou teutana ao a roko iaan mwengau.



I karaba te Uea n rokona ni mwengau ao ngke a kitana mwengau ao I a bon namakina naba te marurung ae E a bon anganai. Te bai ae riki irou n te bong anne ba baai ake I aki konai ni karaoi ao I a kona n aron are ngkana I wene ao I a kona ni baraki ao n tararake. I amarake ao n na-konako iaan te riringa ni biriakina ana waa raurau kainnabau nakon te tairiki anne ao I a maninga are I a maan n aki kakaraoia. Bon te bong anne are I a bon namakina naba te marurung. N te tairiki anne ao e bon nako te rara ao te ran ma e a uarereke n aron are I tataneiai. N te ingabong are imwina ao I a kaman uti ao I a maninga taekan aorakiu bwa ngke I uti ao I nako naba ni kaura te ai ni katoroa te mooi. Aio naba teuana au kanganga are I bon aki kona ni memena i etan te ai ba e bue kuniu iai. Inanon te bong aio ao e a bon toki naba iai nakon te rara ma te ran ao e a bon oki naba korakorau nakon are mai maina.

Bon au karabaraba nakon te Uea n ana kamaiu nakoio rinanoia ana tabonibai aika kain te charismatic iaon abara ae Nikunau. E na neboaki te Uea n taainako. Alleluia alleluia alleluia.

Ana kamimi te Uea

Ian Namakin, St Faustina, Betio Parish

E tabe nanou ni kan tiba ana makuri te Uea ae kamimi nakoira ngkebong n ana auti Peter Kum Kee ma Tabera. A kaoa ara botaki n tataro ibukin te katoki aoraki ao e bon rangi ni kamimi te bai ae riki ba inanon te katoka bai iaoia kain te auti anne ao e a otinako naba te kimoa ae e bubura mai iaan te taibora ao man kekerake nako mataia taan nebobebo. E kaureaki matau ba nna tara moara ao e bon roko irou te mimi ba e na kanga n aki maaku te kimoa ni kerakea te katoki aoraki ke te nebobebo ma te maiti n aomata inanon te auti. Inanon te katoka bai ao ngai are bon aorakiu mamakakin te kimoa e a bon aki tuturu raoi ao iango iaoia aoraki ma l a tabe ni kabaea te kimoa aio ba e na aki biri nakoira. I a tabe ni matakaukinna ma te kamimi ba ngke I kabaea ao e bon bae naba n aki kakamakuri inanon te ianena ae e rebwe taua ao titebo ma e a tabe ni kauangi te kimoa imatara.

Ngke e a bara ara tataro ao te kimoa arei e bon karaua naba ni wene ni nnena arei ma te kainano n aiaron are e kana te poison are kanaia kimoa. Ma ngke ti a ongora irouwia kain te auti ao ngaia bon akea kanaia kimoa ae a tia ni katikua inanon aia auti. E a anaki te kimoa anne ni karenakoaki i tinakun aia auti ba kanga e a bon aki kakamakuri.

I taku ba aio ana kamimi te Uea areti taku ba e kewe te noraba ao n te tai aio ao e bon kaota raoi rabatan te riaboro ae Nei Kimoa Uea nakoira ba ti na kabaea ao e na kaota aron kabaeana irouna. Ibuakon te tibatiba ao iai ae e nora te kimoa ae mainaina.



Kawaran ke uotakin ana tangira te Uea na-kon ana Auti Harry Tiira

Anna Rui, St Faustina, Betio

Mauri tariu ao maneu n ana tangira Te Uea.

N tairikin te Kanimabong ae 3rd June ao ti a reitaki n nebobebo n ana auti ten Harry Tiira are e kainnanoa ana buoka te Uea ibukin aorakina are e weneakinna ae te borike te maraki n ranga. Inanon tain te nebobebo ao l a nora te Tama loane ae tekateka imatan ana auti ae nang kainanoa buoka-

na imwina riki ao l a ongo naba te bana ae tangimaaka i taningau ae ti na katokabai n tamnei iaon te Tama loane. Ngke e a toki te nebobebo ao e a waaki te tibatiba irouwia tarira ao manera.

Ana tangira te Uea ae angan tarira ma manera ae Ataieta e noora te unaine ae tei irarikin te baibu ae uakaan ma tabon te kati i Temakin ni kakaitara ana auti Ten Harry ma matana ae mata n un. E kabaebaea ana tamnei arei ao e raba ana tangira te Uea ba e nako ana tamnei arei ba e a taonnako te unaine arei ao e a bue naba ao e a onea mwiiina otan te taura te bam ae nangi n otamaaka. Ana ka uoua n tamnei e a noora te kamea ae bubura ae roro kunna ae ririaki i tinanikun te auti are e na iangoa naba rinna ni kamangaoa te nebobebo ma ti karaba ana tangira te Uea ba ai aron ae e korotiaaki te kamea arei e bon ririaki naba i tinanikun te auti. E kabaea ana tamnei arei ao e raba riki te Uea n ana tangira ba te kamea are e ririaki arei e nim te taurekereke iaon roroana. Ana kateniua n tamnei, e a bon nora ana auti te Tama loane, e kabaea ma e aki nako, ana tangira riki te Uea e a nora te kaibangaki ae mainaina ae e ababaki ae e tei i nuka ao i etan te kaibangaki arei ao e a nora te mannikiba temanna ae mainaina ao e a kibakiba n ririaki ni katobibia te kaibangaki arei. E kabaea ma e aki nako, ana tangiriki Te Uea e a nora te nang ietan te auti are ti nebobebo iai ao iaon te nang arei ao e a tei lesu ma ana kunikai ae mainaina ao iai te bai ae taua i baina kanga aiaron te kai ae mainaina ae te manoku ni bai abakina. Ana kabanea n tamnei are e anganai, I a nora te auti teuana te kaaba ae on tinanikuna naba nte kaaba ao irarikin mataroan te auti ao iai te aitibaoki ao i nukan te auti arei ao iai temanna te maane ae e wene inanon te auti arei ao taran te aomata are wene arei kanga taran te nuu ae roro are e a wene ni bangaki i nukan te auti arei. E kaota naba te kanikina te aomata arei ba e tangira buokana. Ti karabariki ara Uea ae lesu ibukin ana tangira ao ana nanoanga ae moan te korakora nakoira ni kabane, e raba Te Uea.

Inanon ana tai n tibatiba manera ae Ataieta ao l a ongo te bana ae ngkana iai te bai ae riki ao n na bukinaki iai, ai ngaia are l a manga teirake n tiba ana tangira te Uea areti na katokabai n tamnei iaon te Tama loane.

I a teirake ao l a tibaa te rongorongo arei are ti na katokabai n tamnei iaon te Tama loane. Ti a manga waaki ni katokabai n tamnei iaon te Tama loane. Inanon te



*"Ngke e a bara ara
tataro ao te kimoa arei
e bon karaua naba ni
wiine ni nnena arei
...."*



ianena arei ao I a nora naba te Tama loane ni wene n tangaina, e ti benna ao I a noora naba te bai ae te manoku ni bai ae taua te kai ni iiti ni kotekotea babaana are te atai, ao te Tama are e boni wene naba e nang maan ni wene te Tama ao te bai (hand) arei are e bon tiku naba i babaana ni kotekotea babaana ma ngke e nang toki te nebonebo ma e anaaki te anene ao e nang toki te anene ao I a nora naba te Tama loane n tekateka ni kaitaraai ma ana kabaraaki ae kirin ao e a rangi ni mangurooro.

E raba te Uea n ana Tangira nakiora, Alleluia.

Te Maiu ae Tabu

KO NA MAURI MARIA AE KO ON NTE KARATIA

E reiraki man ana koroboki Father Manelli, S.T.D.ioun Uriam Timiti, St Padre Pio, Suva. Antai Nei Maria?

Tera teuana te anga ae ti kona iai ni kabarabara iai Tinara Nei Maria? N aron are e taekinna te Akanera are Kabiriera ngke e uota ana Rongongo te Atua, e kamaura Nei Maria ni kangai; "Ko na mauri Maria ae ko onrake n te Karatia" (Ruka 1:28), are nanona ba e kaonrakeaki naba Nei Maria n te Tangira n Atua, are ana Tangira te Teniman n te Temanna. Ngaia are e karikaki inanon kororaoi te itiaki, e riki Nei Maria ae te Baretenia ba kanga te tirotaam ae moan te itiaki are na kona ni kaota bannan ni koaua ana Tangira te Atua. E roko Nei Maria ba e na anganira Natina ae te Atua ae lesu mani kauka nakoira kaubain Atinbanna n ai aron ana Tangira te Tama are E kaburea Natina ae te Riki Temanna ibukira (Ioane 3:16).

Kaotan ana Tangira te Nati

Te koaua ae kakawaki ba ane tangira ni koaua Nei Maria, ao e na bon katotonga Nei Maria ni kariki ua aika tamaroa aika uan te karatia ma te raoiroi ao riki bon uan ana Nanoanga te Atua. Te kabotau teuana ao ti kona n tarai a bon St Maximilian Kolbe. Ni uan ana tangira ae moan korakora ibukin te Immakurata, e a tia te Tama Maximilian

Kolbe ni katotonga raoi Nei Maria ni kateimatoa mauina ni Berebitero ae tabu, ao n riki riki ba te Abotoro ae rineaki ba e na mate inanon te nono ni karabuti ibukin kamaeuan temanna raona n te karabuti ba e aonga ni manga kona ni kaitiboaki ma kainabana ao natina. Bon Nei Maria ae e a tia ni buoka St Maximilian ni kona ni katomotonga raoi Iesu ni kaota te tangira ae moan te kakannato are te anga maiuna ibukin temanna (Ioane. 15:13).

Kaburean Maeura Nakon Nei Maria

Ngkana akea Nei Maria iroura ao e na bon mabubu aron mauen lesu iroura are nanona ba ngkana ti aki kaburei maiura nakon Nei Maria ao e na kekerikaki tangiran lesu.

Ti kona n nora te katoto iaon aio ni maiun St Alphonsus de Liguori



are e tangiria n tai nako ba e na iai Nei Maria inanon baai ni kabane ake e karaoi. E taku te Santo aio ba ngkana e kabarabara ao e tangiria n taai nako ba e na iai tamnein Nei Maria. N ana koaua ao e na bon memere korakoran ana kabarabara ngkana akea Nei Maria n te tabo are kabarabara iai.

E reireinira naba te Ekaretia ba e rangi ni kakawaki ae ti kaburei maiura nakon Nei Maria, ngkana ti kan kamaiuaki. E bon katerea naba te Ekaretia ba ti kainnanoa te reitaki ma Nei Maria ngkai bon aio teuana mai buakon ana koaua ao ana reirei te Ekaretia ae e anganira ibukin karekean ana Nanoanga te Atua.

Ti bon aki kona n riki ba katotongan raoi lesu ngkana ti aki tangira Nei Maria n airon are E tangiria Natina ae lesu. E reitia man taku Bobe Pio XII ba aio bon te bai teuana ae kakawaki ae riai n aana mauira ni kiritian. E bon riai n reke ao ni iai nnen Nei Maria ni maeura n aron kaakawakin te tina n te utu are ngaia are e bwebwerake mai irouna te tangira are man nano ao te buroo. Ba tera ae na reke nakon te utu ae akea te tina iai?

E katiteuanira Nei Maria ma lesu

Ngkai bon ana babaire ibukira te Atua te Tama ba ti na "riki ba katotongan ke bannan Natina ae lesu" (Rom. 8:29), ao bon aio naba ana kantanninga Nei Maria are e a tia ni katabanina ao ni ka-aomata bannan lesu i nanona ao are e na teimatoa ni



karabata bannan lesu irouia ake a a kaburei maeuia nakolina. Are nanona ngkanne ba aomata nako ake a muiokoi maiuia iroun Nei Maria a na bon kona n riki ba bannan ni koaua lesu n te tai ae rangi waekoa.

Ao ai kawara ngkanne te koraki ake a taku ba e kairua kaburean maiua nakon Nei Maria ibukin kakororaon maiuia ni Kribati ao karekean te maiu ae tabu? Ti kakoaua ba aio bon kaitaran are ti reireinaki iai iroun te Ekaretia. E taku Bobe St Pio X n ana reta nakoia taan onimaki ba bon akea riki n te aonaba ae ata ma kina riki lesu nakon Nei Maria. Are nanona ngkanne ba bon ti ngaia te moan tia rerei ae kona ni kairira nakon ataakin lesu, ao akea riki ae iai te maaka irouna ni kona ni botira n ti teuana ma lesu.”

E reita te koaua aio Bobe Bauro VI n taku ba e ti tangira te katiteuanaki aio Nei Maria ma Natina, ma bon tabena ae kakawaki ba e na karikia aomata ba katotongan raoi ana moan nati ae lesu. Ai k a k a w a k i r a ngkanne te kaubai ae ti na ka-rekeia n ara reitaki ae moan te tamaroa ma tinara Nei Maria?

E na karokoira Nei Maria i Karawa

Ara tangira nakon tinara Nei Maria boni ngaia kawaira are na karokoira n te tabo are E a kaman motikia te Atua ibukira; bon Nei Maria kakouan karekean Karawa iroura ao matenanoan te kan roko n te Baretaiti.

Aio bon ana Reirei te Ekaretia nakoiria ake a noraki naba n aia reirei tabeman taokitan te Ekaretia aika a rangi ni kinaki n aron aikai. E taku Santo Aukitino ba tan onimaki ni kabane a kaman uouotaki inanon birotan Nei Maria. Are nanona ngkanne ba tangiran Nei Maria boni ngaia te kanikina ae kakawaki ibukin kamaiuakira. E taku naba Santo Bonaventure ba te koraki ake a tia ni maakenaki ni kaburean maiuia ma aia Tangira nakon Nei Maria a na bon bane n rin ariaia n te Boki ni Kamaiu. E kamatoa naba nakoiria Santo Alphonsus de Liguori n taku ba ane e tangira Nei Maria ni koaua ao e na bon akea irouna te nanououa ba e na reke te Bareteiti irouna, n aiaron are e a bon kaman tia n roko

ke ni mena iai.

Ngkana te koaua ba Nei Maria bon ngaia te kanikina ibukin te roko n te Baretaiti, E na riai n reke ngkanne kaburean maiura nakon Nei Maria ba kanga te kaubai ae kakawaki are e karabaki n te tawana (Mataio, 13:44). E reita aio Santo Bonaventure man taku ba “ngkai E rineia te Atua ba E na ruo nako aonteaba rinanon Nei Maria, e bon riai ngkanne ba ti na waerake nako Karawa rinanon Nei Maria are riki ba mataroan te kai-n-tamarake. Bon aio oin ana kantaninga Santo Charles Borromeo ngke e tangiria ba e kateaki tamnein Nei Maria i matan umantabu nako ba a na iai kiritian ni kabane ba ti aki kona n rin n ana Temboro te Atua ngkana ti aki moa rinanon Nei Maria.

E bon riai ngkanne ba ngkana n te tai aio iai ara waki n reitaki ma tinara Nei Maria, ao ti na riai ni kawakinna raoi ao ni karikirakea. Ngkana akea ara waki n reitaki ma tinara n te tai aio ao ti na bubuti ma te botumaka ba e na reke. Ti na ururinga ana taeka Santo John Damascene are kangai, “Te Atua, E anganira te karatia ni kona ni kaburei maiura nakon Nei Maria, ngkana ti kan kamaiuaki. E reitia man taku St Padre Pio ba kaburean maiura ao ara Tangira nakon Nei Maria e kakawaki nakon taian reirei nako n taekan te Aro ao taian rabakau nako i aonteaba. E a manga kamatoa aio Santo Maximilian Kolbe ngke e taku ba, “tangiran Nei Maria e na bon ka-rekeia nakoiria to kona ni maiu ao ni mate inanon te kukurei”.

Ao bon aio ngkanne te koaua. Ba Tangiran Nei Maria bon ngaia te kanikina ibukin kakororaon ana kantaninga te Atua ibukira; bon ngaia te kakoaua ibukin rokora i Karawa ao matenanoan karekean te Baretaiti iroura.



“Ao bon aio ngkanne te koaua,ba karekean rokora n te baretaiti.”





**Ana kakawakin Tinara Nei Maria
Fulltua Taraora, St Teretia n Iesu te Tel, NZ**

Ni moan te ririki aio ao ti baireia ba ti na kabubuta Tamnein Tinara Nei Maria iaan ara auti ngaira kain Santa Teretia n Iesu te Teei iaon Hamilton i Nutiran.

Tamnein Nei Maria aio e bon ababaki ba e nakon 2 te buti abakina ao e bon tob'a Iesu n angamainina ao e taua te Taobe Iesu n te maing ao e karaoiroi n'atai. Inanon bain Nei Maria are te atai bon te aonnaba are e tei te kaibangaki iaona, are e aroria nako moana.

Iai ana baunuea ae koora ao a bane ni koora kunnikaia ni kabane ma a batabata, aki burau ke ni mainaina kunia.

Iai taian tibatiba ake a bon kaotaki iai aron ana ibuobuoki Tinara Nei Maria ake ti nori, ao ti kokoaua ba bon iai naba ake tiaki nori imatara, aika a rangi ni maiti riki nakon ae ti ataia.

Teuana te tibatiba bon taekan aron ana kakawakin nakon te tanga teuna aika Toom ao Teaoia.

Inanon tikun Nei Maria irarikia n Okitoba ao a bane ni kitana te auti kain aia utu n te taina nakon aia reirei ao aia makuri. Toom e tiku n te auti ao e a kukana ana ika n umunna, ao e a ti butinako naba n ana kaa ba e a bo ana tai n ana appointment are e a kaman kabaeaki iai. Inanon tekatekana, are e a bon maan iai, ao e a manga taonaki ana tai, ao e a iangoia ba e nang okira moa ana auti.

Ngke e a okira ana auti ao e noria ba e a onrake n te bubu ae kanga e nang urarake ao ni bue te auti.

E waekoa n rin Toom ibuakon te bubu ae e korakora ba e a uringa ana umum are e katukua ao e a biri ni kamatea te titobu te iti, are e a rangi ni kabuehue, ao nikiran nanon te auti, e a onrake n te bubu ae e korakora.

E bon mimi Toom n te bai are e a taonaki naba ana appointment ao nanona ni kan okira te auti ba ngaia e a kan urarake Tinara Nei Maria ma Natina, ake a bon tauataua te ura arei ba e na aki riki. Ti bane ni reita Toom n ana kakaitau nakon Tinara n ana kakawakin ibukin Natina ao te tanga aio.

E teimatoa te kaitiki aio ni katoa 13 n te namakaina ao ti kakarab'a Tinara Nei Maria n ana bubuti nakon Natina ao taian kakai aika a maiti, nakoira ni bane, aika ti nori ao aika tiaki nori.



*"Ngke e a okira ana
auti ao e noria ba e a
onrake n te
bubu....."*

**Tera am katauraoi imain te
Kiritimati, ni butimaea rokon ara Tia
Kamaiu ae IESU KRISTO?**

